

Yungzsuij: Geij Fanh Vunz Angqhoh "Ciet Mangzhauh"

Ndwen 2 ngoenz 21 liggaueq ndwencieng cibcaet dwg "ciet mangzhauh" gig saenzgeiz Yungzsuij Myauzcuz Swciyen bi gvaq baez haenx, geij fanh vunz doxcomz youq Anhcuiz Yangh diegbya aen yienh neix, ngonx max doxdik, yawj minzsuz, caeuq gyoengq "mangzhauh" caemh boq venz caijdangz, maqmuengh bi moq caijsiq ndei lailai.

Doxcienz cojcoeng Myauzcuz dangdieg yungh faexgeq gaek baenz mauhngeg, daenj luiq au mangzhauh guh baenz haenx, gwnz naj daz danqndaem cang baenz "mangzhauh(vunzgyax)" ndaej dinghen caeggeq daeuj hoenx ciengi doxgaiq. Dajneix, "mangzhauh" couh baenz gij saenzlingz vunzmbanj dangdieg gingqcungh haenx, binaengz liggaueq ndwencieng cibcaet cungj au cingj "mangzhauh" daeuj caeuqfaenh boq venz caijdangz, maqmuengh mbouj miz cainanh, miz caijsiq ndei. Ciet mangzhauh gaenq ndaej liedhaeuj buek daih'it guekgya feihvuciz vwnzva yizcanj mingzloeg "gyoengq hoihbo baenzdaug Myauzcuz" ndawde aen ndeu.

(Veiz Dingjyauh/韦鼎标)



▲ Ciet mangzhauh dabsau Myauzcuz angq diuqfoux.



▲ Boubcoz Myauzcuz cang baenz mangzhauh caeuq doih venz caez youz gai.

Gunghcwngz: Fwen Mbanj-yauz Ciengqgok Seizdaih Moq

Ndwen 2 ngoenz 21, Gunghcwngz Yauzcuz Swciyen banh aen hozdung doxdax fwen "fwen ciengqgok seizdaih moq", 100 lai boub canghfwen minzcuz vunzniox bonjdieg, yungh vah doengsug, singfwen ndeidingq cienzciengq dangjen yinxlingx, cinjing vut gungz, lajmbanj saenqhwnq, dwkcawz bangvunz simnduk, cauhlaeb singz vwnzmingz daengj fwen fatyienz yaemwenq daeuz, naengzliengh cingq, ndaej daengz vunzlai caeuq boubhek haengjgyaez.

(Cwng Ciminj/郑智敏)



► Canghfwen hwnj daiz doxdax fwen.

► Hoih ciu vunz yienh-ciengz



Sihlinz Banh Aen Hoih Ciu Vunz "Guengj-doeng Guengjsae Gapguh Bangfuz Couhnieb"

Ndwen 2 ngoenz 12, Sihlinz Yen youq Bahdaz Cin Couhbangh Cunh ciet diuqbo yienhciegz banh aen hoih ciu vunz "Guengjdoeng Guengjsae gapguh bangfuz couhnieb". Vihliux ndaej bangcoh gyoengq vunzlai gungzhoj daezhawj aen seizgei ok rog dajgoeng, Sihlinz Yen baengh Guengjdoeng Guengjsae bangfuz

gapguh, ngoenzhaw yanghcin, ciet vwnzva minzsuz daengj bingzdaiz banh hoih ciu vunz banggungz couhnieb, daezhawj aen gangjvei couhnieb hawj vunzlai gungzhoj, hawj gyoengqde ndaw ranz souhaeuj ndaej gyalai, ndaej vut gungz baenz miz vaiq di.

(Vangz Yenginz/黄燕群)

Liujcouh: Soengq Fap Haeuj Hoihbo Vunzlai Hag Fap Angq

Ndwen 2 ngoenz 17 dwg liggaueq ndwencieng cibsam, dwg ciet hoihbo cienzdoengj Sanhgyangh Duncuz Swciyen Laujbauj Yangh Laujbah Cunh gaenq miz 200 lai bi haenx, ngoenzhaenx, vunzlai minzcuz vunzniox Dung, Myauz, Yauz daengj ndang daenj buhvaq moqsag daj gyae gyawj comz daeuj Laujbah Cunh, yungh boq venz caijdangz, roegdoxdoj, dohyeh daengj minzsuz hozdung gig miz daegsaek minzcuz vunzniox haenx angqhoh ciengmoq, muengh bi moq fwn yinz rumz swnh, haeuxgwn fungsou, maqmuengh gwn van youq ndei.

Ngoenzhaenx hozdung yienhciegz, vunz lai vunz daih, nauhyied dangqmaz. Baengh aen seizgei neix, Liujcouh Si Swhfazgiz, Sanhgyangh Duncuz Swciyen Swhfazgiz lienzhab

cujciz doih senhconz fapceih bae daengz hoihbo, dawz gij yenzsu fapceih caeuq vwnzva minzcuz dox giethab, haiguh "fapceih vwnzva leih minzcuz hengz" hozdung, dawz faplwd soengq daengz henzndang vunzlai minzcuz vunzniox bae.

Ciuq cam rox, "dangzgoq fapceih hoihbo" dwg Liujcouh Si doiok fapceih senhconz gyauyuz binjbaiz moq, Liujcouh Si giethab gij daegdiemj gizdieg minzcuz vunzniox ciethaiq minzcuz lai, vunzlai minzcuz gietcomz, yienhciegz heiqaenh nauhyied, cinjing gaemdawz seizgei senhconz fapceih, cauhoq guhbaenz le gij vunqsik senhconz fapceih hab vunzlai, rengzrwd daezsang bujfaz senhconz caeuq faplwd fugsah yaugoj.

(Fu Yungjsinh/傅永新 Suz Sinh/粟鑫)



▲ Boubguhong cienzdoh faplwd hawj vunzlai minzcuz vunzniox.